

A Gurize, la IV Conference regionâl su la lenghe furlane

Clamade dongje dal Consei regionâl e inmaneade de ARLeF, si è davuelte ai 9 di Jugn tal Auditorium de Culture Furlane

Ai 9 di Jugn Gurize e à ospitât la IV Conference regionâl su la lenghe furlane, clamade dongje dal Consei regionâl e organizade de ARLeF cul dopli obietîf di valutâ lis ativitâts di tutele e di promoziun fatis intai ultins cinc agns e di proponi gnovis azions utilis pal disvilup de lenghe. Il President dal Consei regionâl, par meti in vore l'articul 30 de L.R. 29/2007 (*Normis pe tutele, valorizazion e promoziun de lenghe furlane*), al clame dongje, almancul une volte ogni cinc agns e dut câs dentri dai prins vincjecuatri mêis di cuant che la legislature e je tacade, une Conference di verifiche e di propueste su la metude in vore de leç su la tutele, valorizazion e promoziun de lenghe furlane. La ultime Conference e jere stade fate tal 2021. «Se o volin pardabon tutelâ la nestre autonomie, o vin di partî de lenghe furlane: e je il cûr identitari dal Friûl e, se e vignis indebilide o pierdude, o laressin a pericol di pierdi ce che nus fâs pardabon unics» al à rimarcât il president dal Consei regionâl dal F-VJ, **Mauro Bordin**.

Chel ospitât de capitâl dal Friûl orientâl al è stât un dopomisdì

penç di lavôrs (viert al public e disponibil ancje in direte streaming). A son stâts presentâts i risultâts otignûts intal ambit dal "Plan gjenerâl di politiche linguistiche pe lenghe furlane 2021-2025", par delineâ lis strategiis futuris pal disvilup dal furlan. «La Conference – cemût che al à sotlineât il president de ARLeF, **Eros Cisilino** – si identifice tant che un moment di riflession, di valutazion e di propueste fundamentâl pe lenghe furlane. In particolâr, e reste simpri fuarte la concentracion des nestris energjiis sui fronts de scuele, dal lavôr e des ativitâts publichis, setôrs là che o vin operât simpri in confront e cun scambis costants cu la Regjon, tant che o vin podût slargjâ lis nestris ativitâts ancje a cualchi universitât foreste e a cualchi Stât european, dut a pro di une politiche linguistiche cun risultâts simpri miôr». Tant che



Il cjistiel di Gurize.

previodût dal program, l'event si è viert cui salûts istituzionâi, par dopo lâ indevant cuntune schirie di intervents moderâts dal diretôr de ARLeF, **William Cisilino**. I à tocjât ae prof.e **Elena D'Orlando**, ordenarie di dirit aministratîf e public de Universitât dal Friûl, di segnâ i agârs dai imprescj de autonomie speciâl par valorizâ e tutelâ lis minorancis linguisticis. Invezit il prof. **Vittorio Dell'Aquila**, docent de Universitât di Milan, al à presentât i dâts su la vitalitât de lenghe furlane, cjapâts sù in graciis de ricercje realizade de IRES F-VJ. Il prof. **Michele Gazzola**, de Universitât dal Ulster, al à invezit fevelât de realizazion e dal ûs dal sisteme informatîf dal Plan '21-'25. La discussion e je lade indevant cun atenzion sul gnûf "Plan gjenerâl di politiche linguistiche 2026-2030", in graciis dai intervents dal prof. **Franco Finco**, docent de Universitât Pedagogjiche de Carinzia e de prof.e **Patrizia Pavatti**, direttore dal Servizi istruzion de Regjon F-VJ. No son mancjâts i aprofondiments su aministrazion publiche, media e tecnologjie, analizâts de dot.e **Veronica De Giorgio**, dal Sportel regionâl pe lenghe furlane, dal dot. **Marco Torresin** e de dot.e **Elena Zanussi**, funzionaris de ARLeF. La zornade si è sierade cuntune discussion vierte al public.

"Marcho. L'ultima bandiera" cumò intun satûl cun DVD, Blu Ray e Ultra HD Blu Ray



Il docufilm "Marcho. L'ultima bandiera", al è cumò disponibil ancje intun prezios satûl. Denti a son: i formâts DVD, Blu Ray e Ultra HD Blu Ray cu la version dal film par furlan, talian e, volint, cui sottitui par inglê; tancj contignûts extra e ancje un librut trilengâl (par furlan, talian e inglê) che al contestualize in maniere precise dal

pont di viste storic la vicende di Marc di Murûs, ultin puartebandiere dal Stât patriarcjâl di Aquilee. Il film al è coprodusût de ARLeF e di Arte Video srl.